

allen Gliedmassen vnablesig zu arbeiten/ dem Beutel sich zu erleichten/ den Kisten sich auß zu leeren/ dz ganze Haus zu segen/ das nichts darinnen bleibe/ was für Freude/ Trost/ oder Hoffnung können sie haben/ als das sie von Reichthumb in eine gewisse vnd vnvermeidliche armuth/ auß freude in schwermuth/ auß ihrer Freyheit in eine betrübtte Dienstbarkeit gerathen. Seyndt sie zuvor freygebige gewesen/ haben ihres guts gebraucht/ wol dabey gelebet/ müssen sie nun mehr anfangē den Daulmen in der Handt zu halten/ zu filzen/ kargen vnd ihrem eigenen Leib ab zu brechen: haben sie friedlich vnd ruhig gelebet/ müssen sie nunmehr alles vnfriedes vñ stettiger beides eusserlicher vñ innerlicher Vnrue gewohnen. Wie solte ein armer Litigant nit schwer vñd kleinmühtig werden/ wann er alle tag den beutel so oft vnd schwerlich muß ziehen? Hiezv fordert der Doctor zehen Cronen/ dort der Notarius sechs/ der Anwaldt vier/ der vorgebieter eine/ die Gerichtsbotten/ Statknecht vñ Pedellen/ Thorhüter/ stubenheiser/ schreiber wollen auch ihr theil haben: der Richter fordert/ wie billich/ seine portulas, der Gerichtschreiber das Br. theil vñ Copie gelt/ seine Copisten wollen auch ihr tranckgeld haben/ in summa sie haben sich alle mit einander dahin vereinigt/ das sie ihn wollen auffreiben/ vñ fallen in an allen seiten an/ wie die Hunde/ Rabē vñ Geyer ein todtes Raß. Etliche gebē für die Litiganten seyen große Sünder/ an der gewissen erfahrung aber befindet sich gänzlich das widerspiel. Dan an hoffart kan er sich nicht vergreifen/ sintemal er voller gedanken gehet/ mit nidergeschlagenen augē/ sihet er auff seine füsse/ vñ ist nichts/ als lautere demuth an ihm zu sehen. Desgleichen/ darff man sich auch nit fürchten/ dz er sich am geiz vergreiffe: dan er muß nur zu viel speyren/ das er auch offtmals nit einen schilling zu seiner notturfft in den Händen behelt. Für der Acedia faul vñ tregheit ist er wol gesichert/ dan er hat wenig zeit darzu: wird wol herum getrieben/ vñ lauffet stetig vmbher: baldt zum Advocaten/ baldt zum Anwaldt/ baldt zu den Gerichtsbotten/ baldt auff's Rathhaus/ bald muß er in der Stadt vmbher lauffen vnd seine Zeugen zusamen bringen/ bald anderswohin vnd hat er andere geschefte dabey/ so muß er auch dieselbige wol an einen nagel hängen/ da mit ja hie nichts verseumet werde. Die Gula kan ihn auch nit leichtlich verführen/ dann er wird von seinen Advocaten vnd helffern dermassen beschoren vñ seinem Beutel also zugesprochen/ das ihn nit viel nach guten Bisplein gelüffet/ vñ muß sich wol mit truckenē Brodt oder Tischtuch behelffen. Luxuria wirdt ihm auch den schaden nit thun/ dann er hat soviel zu bedencken/ so viel zu lauffen/ das ihm der Beutel wol vergehet. Vnd wann sie frey weren

von Ira & Inuidia, von Zorn vñd Neid/ so möchte man sie wol für heilige Leut halten. Seyndt aber auch Menschen/ vñ treibt sie der Zorn zu allerhandt vnwillen vnd vngedult/ murren vber ihre Advocaten/ denen sie oft ihre rechte Namen geben/ fluchen dem Notario Anwalten/ ja offtermals auch dem Richter selbst/ die Botten thun ihnen nit recht/ die Leges haben keine handthaben/ die Doctores hangen den Mantel nach dem Windt/ machen schlecht krum/ vñ krum schlecht/ in summa es gehet alles vberzweg/ wie das Ferrarische Geschick vor Rauenna, vñ wann sie gelegenheit vermeinen zu haben/ so muß auch Gott vñ seine Heiligen herhalten/ vñ fluchen ihnen wol tausendmal in einer stundē. Inuidia thut ihnen auch zimlich gedräng/ dann sie können den vorschub ihrer Segenpart nit mit guten Augen ansehen/ nicht leiden/ das man ihnen in etwas recht gebe/ vñ ist ihnen alles zu wider/ woz sie nur mit den selbigen vortregliches sehet es sey in worten/ wercken/ oder in geberden/ so treibet es ihne die Gall vber/ vñ wird dz Herz verbittert. Alle ihre anschlāg gehen da in/ wie die accusaciones vñ klagen recht vñ gnugsam auffgezeichnet werden/ dz man dem gegentheil nit zu viel zeit gebe/ das die authores, deren sie sich zu behelffen/ recht allegirt/ des gegentheils begeren abschlagen/ ihre probatione angenommen/ die Zeugen gehört vnd gebührlich examinirt/ der Proceß recht geführet/ die relations notirt/ ihre sache befördert/ ein verdächtiger Richter recusirt/ &c. Vñ so die Sache ihnen zu widerläufft/ zu rechter zeit appellirt/ die Acta revidirt vñ wider von vornen angefangen werde. Vnter dessen haben sie auff einer andern seitten auch gnugsam zu thun/ das sie Geld machen/ damit sie ihre Leut auffzahlen vñ zu freunden behalten/ da muß in an verkauffen/ versehen/ entlehen/ vnd zusamen treiben was man kan/ bis man ins Hospital geräht/ vnd in eusserster Armut/ Vnwillen/ vnd Verzweiflung stirbt vnd ewig verdirbt. Die Egyptier seyndt mit zehen plagen gestrafft worden/ nemlich mit Blut/ mit Fröschen/ mit ungeziffer/ Si/ gen/ Hewschrecken/ Finsterniß Pestilensblattern/ vñ Vngewitter/ mit Aufsaß vñ tödtung irer ersten geburt/ die Litigantē aber seyndt beynahē härter gestrafft: dann sie müssen ire erst vñ legt geborne/ od alle ire Kinder verlassē/ ohne einigē auffenthalt/ sintemal die Harpien alles auffgefressen/ sie gehē allein/ niemandt nimpt sich irer an/ wann sie nichts mehr haben/ vnd seyndt veracht/ wie die Aufsaßigen/ dann auch ihr eigene Freunde sie nit mehr kennen wollen: Müssen auch allerhandt vngewitter/ allerhandt verweiff vñ vorwerfften lassen vber sie gehen/ all ihr einkomen ist verfallen/ vnd hat ihnen der Hagel in den Beutel geschlagen/ jederman fleucht für ihnen/ als wann